




पाठ 3

मुसवा रइथे जी

पाठ परिचय— अलग-अलग जीव के रहे के ठिकाना अलग-अलग रहिथे। जइसे चिरइ मन खोंधरा बना के रहिथे अउ गेंगरुवा ह कच्चा माटी म रहिथे। ए गीत म किसम-किसम के जीव के रहे के ठिकाना बताए गे हावय।

कउँवा रइथे खोंधरा म अउ,
बिला म मुसवा रइथे जी ।
कोलिहा रइथे खेत-खार म,
पानी म केछवा रइथे जी ॥



चाँटी रेंगय भुइयाँ म अउ,
मछरी तउँरय पानी म।
मेचका रइथे दुनो जघा म,
कोठा म गरुवा रइथे जी॥



कुकुर ह रइथे खोर-गली म,
मिट्ठू रुख-राइ म जी ।
रेरा चिरइ के खोंधरा सुघघर,
माटी म गेंगरुवा रइथे जी ॥




शिक्षण संकेत— कविता ल राग ले पढ़य अउ लइका मन ल पढ़वावँय। लइका मन के दल बना के दूदी पंक्ति एकक दल ले सरलग बोलवावयँ। पाठ म आए जीव-जंतु ल छोड़ अउ आने जीव-जंतु के नाँव अउ उँखर रहे के जघा के गोठ-बात करँय।

केकरा घलो बिला म रइथे,
 खुसरा रइथे खोंड़रा म।
 भँइसी रइथे भँइसथान म,
 कोठा म पँड़वा रइथे जी॥



हाथी रइथे बन-जंगल म,
 बेंदरा डारा-खाँधा म।
 हवा म किंजरत रइथे फाँफा,
 माँड़ा म बघवा रइथे जी॥



कठिन शब्द मन के हिन्दी मायने –

रेरा = बया चिड़िया,	खोंधरा = घोंसला	गेंगरुवा = केंचुवा
पँड़वा = भैंस का बच्चा	माड़ा = गुफा	खोंड़रा = कोटर
डारा-खाँधा = पेड़ की शाखा		

खाल्हे म लिखाय शब्द मन के अर्थ हिन्दी म लिखव-

सुग्घर =
 बिला =
 मुसवा =

केकरा =
 कुरिया =

प्रश्न अउ अभ्यास

गतिविधि—

गुरुजी कक्षा ल दू दल म बाँट देवँय। दुनो दल एक दूसर ले मुँहअखरा प्रश्न पूछँय। पाछू गुरुजी ह घलो मुँहअखरा प्रश्न पूछँय। कुछ प्रश्न अइसन हो सकथे—

- (क) कोलिहा कहाँ रइथे ?
- (ख) काखर खोंधरा सुग्घर होथे ?

बोध प्रश्न—

प्रश्न 1. ए प्रश्न मन के उत्तर लिखव ?

- (क) कउँवा कहाँ रइथे ?
- (ख) बिला म कोन—कोन रइथे ?
- (ग) कोन जीव ह पानी अउ भुइयाँ दूनो जघा म रइथे ?
- (घ) गरुवा मन कहाँ बँधाथे ?
- (ङ) पानी म रहइया जीव—जंतु के नाँव लिखव ?

भाषा—अध्ययन अउ व्याकरण—

प्रश्न 1. पढ़व समझव अउ लिखव

- | | | | | | |
|-----------|---|------------|-----------|---|--------|
| 1. कउँवा | — | काँव—काँव। | 4. बेंदरा | — |। |
| 2. कोलिहा | — |। | 5. मिट्ठू | — |। |
| 3. मेचका | — |। | | | |

प्रश्न 2. जोड़ी मिलाव—

- | | | |
|-----------|---|--------|
| 1. पिंजरा | — | बघवा |
| 2. कोठा | — | मछरी |
| 3. माड़ा | — | केकरा |
| 4. पानी | — | मिट्ठू |
| 5. बिला | — | गरुवा |

प्रश्न 3. खाल्हे म लिखाय वाक्य मन ल हिन्दी म लिखव

- (क) रेरा चिरइ के खोंधरा सुग्घर होथे।
- (ख) फाँफा हवा म किंजरत रइथे।
- (ग) केकरा घलो बिला म रइथे।
- (घ) मछरी पानी म तउँरथे।

समझव — कतकोन जीव-जंतु के नाँव ल सँघरा बोले जाथे।

जइसे : कुकुर — बिलइ

प्रश्न 4. ए पाठ म आय शब्द मन बर जोड़ी (सँघरा अवइया शब्द) खोज के लिखव।

1. खेत —।
2. गाय —।

प्रश्न 5. पढ़व, चिन्हव अउ सबले अलग ल छोट के लिखव—

- (क) बघवा, कउँवा, हाथी, कोलिहा
- (ख) खोंधरा, बिला, जलेबी, पिंजरा
- (ग) रेरा चिरइ, मिट्ठू, कोइली, केकरा
- (घ) बेंदरा, मछरी, केछवा, मेचका

प्रश्न 6. खाली जघा ल सही शब्द छोट के भरव—

- (क) मछरी ह। (उड़थे / तउँरथे)
- (ख) चाँटी ह। (रेंगथे / दउँड़थे)
- (ग) मिट्ठू ह। (उड़थे / भूँकथे)
- (घ) केकरा ह। (दउँड़थे / रेंगथे)

योग्यता विस्तार—

1. मछरी, मेंचका, कउँवा अउ मिट्ठू के चित्र बनावव।
2. चिरइ मन अपन खोंधरा ल कइसे बनाथें ? देख के बतावव।
3. मुसुवा अऊ बेंदरा के अलग-अलग कहिनी खोजव अउ कक्षा म सुनावव।
4. चार प्रकार के चिरइ मन के खोंधरा के बारे म लिखव—
 - (1) खोंधरा बनाए के जघा कोन तिर हे ?
 - (2) खोंधरा बनाए बर का-का जिनिस के उपयोग होए हे?
 - (3) खोंधरा ह दूसर चिरई के खोंधरा ले का-का बात म अलग हे ?

